



Sujet 2023 Taxi, uf di warti nämli...

Chunsch z Obig schpot vom Usgang heim,
us dr Schtadt im 10er Tram vo Arlesheim,
wartisch bim Kiosk ufs Ruef-Taxi vom Kopp,
dänggsch jetzt bin i schnäll dehei, das ist top,
doch leider mues ich dir jetzt sage,
du wartisch und wartisch uf dä Wage...
s Ruef-Taxi näh, jä näi si!
So schnäll chasch jetzt nimm dehäi si.

Im Früelig und Summer bis in die schpoti Nacht,
het s Ruef-Taxi, z Nacht sini Arbäit gmacht,
im Herbscht und Winter wenn d Blätter falle,
het s Ruef-Taxi mir gmacht au e Gfalle,
chönet ihr's erahne? Mir wüsse's scho,
mir sin immer bhietet und warm häime cho,
häime fahre für e Schnäg, das isch jetzt verbi,
es gohts länger, wenn wieder wotsch dehäime si.

Hey, chum emol do ane ha ich gruefe,
und grad es Ruef-Taxi welle bueche,
bisch an de Gmeindsversammlig nit go schtimme?
dä Taxi dä, dä fahrt scho länger nimme,
doch lehrt uns das Joor unsere Verschtand,
mir hän's doch no immer sälber in dr Hand,
wotsch dass, unser Ruef-Taxi wieder fahrt,
denn mach di wens druf a chunt schnäll parat,
und setz di au für's Ruef-Taxi i.
denn sind so schäbigi Zyte schnäll verbi.

Als „Alti“ blibe mir dehäi,
und schtelle fescht, mir sind nit eläi,
mir lehre jetzt wie mir uns mien verhalte,
und folge – mir ghöre jo zu de „Alte“,
d Verwaltig beschtimmt jetzt unser Läbe,
aber mir hoffe unser Ysatz sig nit ganz vergäbe,
s brucht no Geduld und no läuft's schlächt,
glyych – schöni Fasnacht – jetzt erscht rächt!

An de Gmäini hän d „Schnägge“ s Ruef-Taxi abgschosse,
und bi dere Abschtimmig mehrhätlig beschlosse,
inskünftig uf die Dienschtläischtig völli z verzichte,
und die Dienschtläischtig z Fuess ab sofort sälber z verrichte.
Bisch aber alt, chasch nüm gut laufe und wilsch nüm mit dim Chare fahre,
nützt dir das nüt, wenn d Verwaltig au do no duet schpare,
s Mobilitätsverhalte het sich dütlig veränderet, säit uns de Karli Schenk,
aber är häig für die Alte scho jetzt s richtigi Geburtstags-Gschenk,
mit E-Bike, Pick-E-Bick, Usleih-Trotinett oder so,
chönet ihr Alte au problemlos häime cho,
Mir d'Spezi bitte euch, verzichtet au uf de Ortsbuss und Uber,
nue e so blibt Oberwil au witterhin suuber.